



Los ntawm Thawj Tswj
Hwm Henry B. Eyring
Tus Pab Cuam thib Ib hauv
Thawj Pawg Thawj Tswj Hwm

Cov Phooj Ywng uas Muaj Siab Ntseeg

Ib tug nqi zog zoo kawg uas tus Cawm Seej muab tau rau peb yog thaum nws hu peb ua nws “cov phooj ywng.” Peb yeej paub hais tias Nws hlub peb cov uas yog Leej Txiv Saum Ntuj Ceeb Tsheej cov me nyuam nrog txoj kev hlub uas zoo tag nrho. Txawm yog li ntawd los, rau lawv cov uas tau muaj siab ntseeg es rau siab nrog Nws ua Nws tej hauj lwm, Nws tseem muab lub npe zoo heev no tshwj tseg rau lawv. Tej zaum nej nco qab cov lus hauv phau Lus Qhuab Qhia thiab Kev Khi Lus tshooj 84: “Thiab kuv rov qab hais dua rau nej, kuv cov phooj ywng, vim txij no mus kuv yuav hu nej ua phooj ywng, tsim nyog uas kuv muab txoj lus txib no rau nej, kom nej thiaj rais los mus ua ib yam li kuv cov phooj ywng yav thaud kuv nrog lawv nyob ua ke, nrog lawv taug kev mus qhia txoj moo zoo yam muaj kuv lub hwj chim heev” (D&C 84:77).

Peb rais los mus ua Nws cov phooj ywng thaum peb sawv Nws cev mus ua hauj lwm pab lwm tus neeg. Nws yog tus yam ntxwv zoo tag nrho ntawm hom phooj ywng uas peb yuav tsum rais los mus ua. Nws tsuas xav kom tau qhov zoo tshaj plaws rau Nws Leej Txiv Saum Ntuj Ceeb Tsheej cov me nyuam xwb. Lawv tej kev siab yuav yog Nws tej kev zoo siab. Nws yeej tu siab rau lawv tej kev tu siab ib yam li yog Nws tej kev tu siab tiag, vim Nws tau them tus nqi rau lawv tej kev txhaum tag nrho tib si, Nws tau nyiaj lawv tej kev tsis zoo, tej teeb meem, thiab hnov tau lawv tej kev kho siab. Nws ua siab dawb

paug ua tej no. Nws yeej tsis yuav nqi dab tsi rau Nws tus kheej li, tab sis muab tag nrho tej yeeb koob rau Nws Leej Txiv Saum Ntuj Ceeb Tsheej. Tus phooj ywng zoo tag nrho, Yexus Khetos, yeej ua siab dawb siab zoo muab kev zoo siab rau lwm tus.

Peb sawv daws uas tau khi lus thaum ua kev cai raus dej twb cog lus hais tias peb yuav ua raws li Nws tus yam ntxwv es ib leeg txaus siab ris ib leeg tej nra li uas Nws ua (saib Mauxiyas 18:8).

Ob peb hnuv tom ntej no nej yuav muaj lub cib fim los ua ib tug phooj ywng rau Nws. Tej zaum yuav yog thaum nej taug ib txoj kev muaj plua av. Tej zaum yuav yog thaum nej zaum hauv ib tsheb ciav hlau. Tej zaum yuav yog thaum nej nrhiav chaw zaum hauv lub Koom Txoos ib pawg neeg ntseeg. Yog hais tias nej ntsia, ces nej yuav pom ib tug neeg ris ib lub nra hnyav heev. Tej zaum yuav yog ib nras kev tu siab los sis kev kho siab los sis kev chim siab. Tej zaum nej yuav pom tau thaum nej twb thov Vajtswv kom tus Ntsuj Plig muab qhov muag rau nej saib mus rau hauv tej siab thiab cog lus hais tias nej yuav pab tsa tej tes uas tsa tsis taus lawm xwb.

Cov lus teb rau nej cov lus thov Vajtswv tej zaum yuav yog ib tug phooj ywng, uas nej twb tsis tau pom ntev ntev los lawm, tab sis tam sim no nws ho xav tau kev pab es nej cia li xav txog nws thiab xav hais tias nws qhov teeb meem los yog nej qhov thiab. Tau

muaj ib zaug li ntawd rau kuv thiab. Yeej muaj cov phooj ywg uas nyob deb deb heev thiab nco qab txhawb nqa kuv tau ntau xyoo lawm uas twb yog Vajtswv qhia rau lawv txog kuv lub nra es lawv thiaj li paub txog xwb.

Vajtswv cov yaj saub uas muaj sia nyob twb tau hais rau peb lawm kom ua cov phooj ywg uas muaj siab ntseeg es mus pab cov mej zeej uas hloov siab los ntseeg thiab mus pab cov uas tau txav mus deb lawm. Tej no peb yeej ua tau, thiab peb yeej ua tau yog hais tias peb nco ntsoov txog tus Cawm Seej. Thaum peb cev tes mus pab thiab mus pab ris lwm tus lub nra, tus Cawm Seej yeej nrog peb mus thiab. Nws yuav pab coj peb mus rau cov neeg uas xav tau kev pab. Nws yuav pab qhia peb kom peb paub hais tias lawv xav li cas. Thaum peb rau rau siab pab lawv, ces peb yuav tau qhov khoom plig uas qhia kom peb txawj paub tseeb hais tias Nws hlub lawv. Ces qhov no yuav ua rau peb muaj siab loj thiab muaj zog cev tes mus pab lwm tus ntxiv nrog kev ntseeg.

Ces ntev mus, thiab tas mus ib txhis, peb yuav muaj kev xyiv fab los ntawm qhov uas Nws yuav txais peb los ua Nws ib co phooj ywg uas muaj siab ntseeg. Kuv thov kom tau qhov koob hmoov ntawd rau peb sawv daws thiab rau cov neeg uas peb pab.

QHIA LOS NTAWM TSAB XOV NO

Cov neeg hauv ib tse neeg yuav xav koom tes dua yog hais tias hais kom lawv nrhiav ib yam dab tsi thaum lawv nyeem tej vaj lug kub thiab cov yaj saub tej lus (saib *Teaching, No Greater Call* [1999], 55). Thaum koj nyeem zaj lus, hais kom cov neeg hauv tsev neeg nrhiav tej ntsiab cai uas yuav pab tau lawv kom ua neej tsim nyog txaus los ua tus Tswv tus phooj ywg.

Teaching, No Greater Call hais tias: “Yog hais tias koj muaj kev hlub li Khetos muaj, ces koj thiaj li yuav npaj tau los mus qhia txoj moo zoo. Koj thiaj li yuav paub pab lwm tus kom lawv los paub tus Cawm Seej thiab ua raws li Nws” (12). Nrhiav tej ntsiab cai ntawm zaj lus qhia saib yuav ua li cas pab tau koj ua ib tug mus qhia tom tsev zoo dua. Nrog koj tus khub sib tham, thiab thov Vajtswv saib yuav ua li cas thiaj li ua tau “cov phooj ywg uas muaj siab ntseeg” rau cov neeg uas neb mus qhia.

KEV HLUAS

Tus Neeg Tshiab

Los ntawm Matthew Okabe

Zoo li tsis muaj leej twg uas nyiam kuv li. Peb tsev neeg nyuam qhuav tsiv deb heev los. Pawg ntseeg tshiab no muaj cov hluas coob heev, tab sis no yuav yog thawj zaug uas kuv yog tus, “neeg tshiab.” Qhov phem tshaj plaws yog kuv yuav tsum mus kawm ntawv rau ib lub tsev kawm ntawv tshiab, thiab kuv txawm xav tam sim ntawd hais tias, “Kuv yuav nrog leej twg zaum ua ke thaum noj su?” Tej zaum kuv yuav pom ib tug neeg uas nrog kuv mus tshawj, tiam sis kuv tsis tau xav nrog lwm tus neeg sib txiv noj su, twb yog vim kuv tsis paub xyov lawv puas xav kom kuv nrog lawv koom noj su!

Thawj hnuv mus kawm ntawv ntev tsis ntev li. Thaum kawg lub tswb uas qhais tias txog caij noj su txawm nrov. Thaum kuv nkag hoob noj su, kuv thov Leej Txiv Saum Ntuj Ceeb Tsheej pab kuv nrhiav kom tau ib tug neeg uas kuv paub. Kuv xam ncig lees saib kuv puas pom leej twg uas kuv paub. Tsis muaj leej twg hlo li. Ces kuv txawm mus rau ib lub rooj nyob sab tom ub thiab noj kuv qhov su kuv ib leeg xwb.

Tom qab no thaum kuv kawm hoob ua zauv, kuv txawm pom ib tug neeg uas kuv paub. Kuv twb pom David nyob ntawm kev kawm vaj lug kub tag kis ntawd. Nws hais kom kuv muab kuv daim ntawv qhia caij nyoog rau nws saib thiab nws txawm pom tias wb ob leeg noj su thaum tib lub sij hawm. “Ua li, thaum noj su hnuv no, koj nyob qhov twg ne?” nws hais.

“Kuv nyob ntawm hoob noj su sab tom ub,” kuv teb.

“Yog li ntawd, tag kis koj los nrog kuv noj su ua ke,” nws hais.

Kuv zoo siab heev rau ib Leej Txiv Saum Ntuj Ceeb Tsheej uas hlub kuv, thiab uas paub hais tias peb txhua tus xav tau kev pab li cas thiab uas teb peb tej kev thov txog Nws. Kuv kuj zoo siab uas muaj leej twg kam cev tes los nrog kuv ntaus phooj ywg. Ib yam yooj yim npaum li caw leej twg ua dab tsi yeej pab tau ntau yam.

Yexus Khetos, Peb tus Phooj Ywg Zoo Tshaj Plaws

Thawj Tswj Hwm Eyring hais tias Yexus yog peb tus phooj ywg zoo tshaj plaws. Nram qab no yog ob peb yam uas Yexus ua kom thiaj qhia tias Nws ua peb tus phooj ywg zoo tshaj plaws.

Nws xav ua kom tau qhov zoo tshaj plaws rau peb.

Nws zoo siab thaum peb zoo siab.

Nws tu siab thaum peb tu siab los yog mob li cas.

Nws raug txom nyem vim yog peb tej kev txhaum kom peb thiaj li rov qab mus cuag peb Leej Txiv Saum Ntuj Ceeb Tsheej.

Ua ib tug Phooj Ywg rau Yexus

Thawj Tswj Hwm Eyring hais tias peb nrog Yexus ua phooj ywg tau thaum peb sawv nws cev nrog lwm tus neeg ua hauj phooj ywg. Teeb duab txog plaub yam nram qab no uas qhia saib koj yuav ua li cas ua tau phooj ywg nrog rau lwm tus neeg.

Koj pab tau ib tug neeg uas tu siab.

Koj nrog ib tug neeg kho siab ntaus tau phooj ywg.

Koj caw tau ib tug neeg nrog koj mus tshawj.

Koj nco ntsoov tau Yexus.

© 2010 los ntawm Intellectual Reserve, Inc. Ceev txhua txoj cai. Luam tawm hauv Teb Chaws Amelikas. Pub luam tawm ua lus As Kiv: 6/09. Pub txhais lus Hmoob: 6/09. Kev txhais *First Presidency Message, July 2010*. Hmong. 09367 295



Ntxiv Dag Zog rau tej Tsev Neeg thiab tej Vaj Tse

Ua tib zoo kawm tej ntaub ntauv no, thiab raws li qhov tsim nyog, nrog cov viv ncaus uas koj mus xyuas sib tham txog tej no. Siv cov lus nug kom pab ntxiv dag zog rau koj cov viv ncaus thiab kom thiaj nruab tau lub Koom Haum Niam Tsev tej kev coj ua rau hauv koj lub neej.

Los ntawm cov Vaj Lug Kub: Chiv Keeb 18:19; Mauxiyas 4:15; D&C 93:40; Moses 6:55–58

Pab Lwm tus Neeg Thaum Twg Muaj Cib Fim Pab

“Peb txhua tus nyias tsev neeg txawv nyias. Ib txhia tsev neeg muaj niam muaj txiv thiab muaj me nyuam tib si. Ib txhia khub niam txiv tsis muaj me nyuam nyob hauv tsev lawm. Coob tug mej zeej ntawm lub Koom Txoos tsis tau yuav poj niam los yog yuav txiv, thiab ib txhia kuj tau muaj me nyuam tiam sis sib nrauj lawm es nyob nws ib leeg niam txwv xwb. Lwm tus ho yog poj ntsuam los yog yawg ntsuam uas nyob lawv ib leeg xwb.

“Txawm hais tias peb tsev neeg zoo li cas lawm, peb sawv daws tseem ua hauj lwm ntxiv dag zog tau rau peb tej tsev neeg los yog pab lwm tus neeg ntxiv dag zog rau lawv tsev neeg.

“[Muaj ib zaug] kuv so hauv kuv ib tug txheeb ze tus ntxhais lub tsev nrog nws tsev neeg. Hmo ntawd ua ntej cov me nyuam mus pw, peb muaj tsev neeg hmo ua ke thiab nyeem vaj lug kub ua ke. Cov me nyuam txiv qhia txog Lihais tsev neeg thiab txog qhov uas nws hais kom nws cov me nyuam tuav rawv tus nqaj hlau, uas yog

Vajtswv txoj lus. Thaum lawv tuav rawv tus nqaj hlau, ces lawv yuav puaj phais thiab yuav taug tau kev mus rau kev xyiv fab thiab kev zoo siab tag nrho. Yog tias lawv tso tseg tsis tuav tus nqaj hlau lawm, ces tej zaum lawv yuav poob deg hauv tus dej liam sim.

“Kom thiaj qhia txog tej no rau cov me nyuam, lawv niam ua txuj ua tus ‘nqaj hlau’ uas lawv yuav tsum tuav rawv, thiab lawv txiv ua txuj ua tus dab ntxwng nyoog, uas sim ntxias cov me nyuam tawm ntawm kev puaj phais thiab kev zoo siab. Cov me nyuam puav leej nyiam zaj dab neeg ntawd heev thiab lawv kawm saib nws tseem ceeb npaum li cas kom tuav rawv tus nqaj hlau. Tom qab zaj dab neeg los ntawm vaj lub kub ntawd, txog sij hawm rau tsev neeg thov Vajtswv ua ke. . . .

“Kev kawm vaj lug kub, tsev neeg hmo ua ke, thiab kev thov Vajtswv ua ib tse neeg puav leej yuav ntxiv dag zog rau tsev neeg. Peb yuav tsum siv txhua lub cib fim kom ntxiv dag zog rau tsev neeg thiab ib leeg txhawb nqa thiab pab ib leeg kom taug nraim txoj kev yog.”¹

Barbara Thompson, tus pab cuam thib ob hauv Koom Haum Niam Tsev pawg thawj tswj hwm.

Los ntawm Peb zaj Keeb Kwm

Txij thaum chiv keeb los, lub Koom Haum Niam Tsev muaj txoj hauj lwm kom ntxiv dag zog rau tej tsev neeg thiab tej vaj tse. Tus Yaj Saub Yaucej qhia cov muam nyob ntawm ib lub rooj sab laj ntawm lub Koom Haum Niam Tsev hais tias, “Thaum nej mus txog tsev, tsis txhob hais lus saib tsis tau los yog siab nej tus txiv, tiam sis cia kev ua siab zoo, kev siab hlub, thiab kev hlub coj nej tej hauj lwm mus lawm tom ntej.”²

Thaum xyoo 1914 Thawj Tswj Hwm Joseph F. Smith qhia cov poj niam hauv lub Koom Haum Niam Tsev hais tias, “Nyob txhua qhov txhia chaw uas tib neeg tsis paub zoo los yog to taub zoo hais txog tsev neeg, . . . ces lub koom haum no nyob ntawd los yog nyob ze, thiab dhau los ntawm lawv tej txuj ci thiab tej kev tshoov siab uas lub koom haum no muaj, cov poj niam no npaj lawm qhia txog tej hauj lwm tseem ceeb no.”³

LUS CIM

1. Barbara Thompson, “His Arm Is Sufficient,” *Liahona*, Tsib Hlis Ntuj 2009, 84.
2. *Teachings of Presidents of the Church: Joseph Smith* (2007), 482.
3. *Teachings of Presidents of the Church: Joseph F. Smith* (1998), 186.

Peb Ua Tau Dab Tsi?

1. Muaj tej tswv yim dab tsi hais txog kev ntiv dag zog rau tsev neeg thiab tej vaj tse uas koj yuav qhia tau rau koj cov viv ncaus? Thaum koj xav txog saib lawv xav tau kev pab li cas, tus Ntsuj Plig yuav muab tswv yim rau koj.

2. Koj yuav hloov tau tej yam uas koj saib ua tseem ceeb li cas lub hli no kom thiaj ntiv dag zog rau koj tsev neeg thiab koj vaj tse zoo dua?

Kom tau ntaub ntawv xov xwm ntiv, cia li txuas rau www.reliefsociety.lds.org.